

‘A RICO’ITA

Cuntu ‘a scena comu era ‘na vota
‘n jurnu ntall’aria , â tiempu ‘i ricòita :

Jàvi gghià ‘n piezzu ca l’aria è tagghiata,
ma ancora si sèri rarièri â timugna.
Ma èccu ‘n sciusciu, ‘n fuddittu, ‘na vintiàta :
S’adduna ‘u massaru e, isannu li pugna :

“Taliati, ‘u jàddu si misi a furriari !
Tutti ntall’aria, arriva lu vientu !
Manu â trarenta, forza, a spagghiari !
Jàvutu, ‘nca ‘a pagghia lassa ‘u furmientu !”.

‘U sulì abbruscìa e ‘u cauru spila,
ma cu ci abbara se ‘u vientu è a favuri ?
E cu senti ‘u pruvulazzu ca anfila
ntí la carni viva e ‘mpasta ‘u sururi ?

E appuoi ccâ pala e cerni cò crivu,
cuccidda ri oru ô sulì lucenti,
--ancora li viru mentri ca scrivu—
comu nu sbruffu ca scrusci ô punenti.

E â sira ‘a ràzzia ri Ddiu è arricugghiuta,
ppô pani, ppâ vita, pp’abbramu ca ‘nfoca.
Ma ‘m puocu ‘i pagghiocca ppi tutta ‘a tinuta,
ppi premiu arresta, ca ‘u vientu ci joca.